

मार्निंग डोगरी न्यूज़ बुलेटिन, समें. 09.20 Hrs

<><><><><><>

### Headlines

- उपराज्यपाल मनोज सिन्हा हुंदी अगुवाई च भारती प्रतिनिधिमंडल रूस थमां भगवान बुद्ध हुंदे अवशेष वापस आहनने लेई रवाना।
- सदिएं परानी दरबार मूव आहली रिवायत परतिए बहाल, जम्मू-कश्मीर सरकार नै स्यालै दरान जम्मू च सिविल सचिवालय लग्गने दी घोशणा कीती।
- मुख्मंत्रि उमर अब्दुल्ला होरें आरक्षण सरबन्धी रिपोर्ट गी मंजूरी दिती, उपराज्यपाल हुंदे कश मंजूरी लेई भेजेआ जाग।
- मुख्मंत्रि उमर अब्दुल्ला हुंदी अगुवाई आहली सरकार दा इक बरा पूरा, उपमुख्मंत्रि होरें आखेआ जे सरकार लोकें दे सुखने गी साकार करने ते उंदी आसैं-मेदें गी पूरा करने लेई बचनबद्ध।
- हिज्बुल मुजाहिद्दीन दे कमांडर मोहम्मद युसफ शाह खिलाफ सार्वजनिक हुक्म जारी, बडगाम च पाकिस्तान आधारित आतंकी दी संपत्ति जब्त।

<><><><><><>

### LG-Relics

उपराज्यपाल मनोज सिन्हा होर अज्ज रूस दे कल्मीकिया रवाना होई गए जित्थे ओह भगवान बुद्ध हुंदे पवित्र अवशेषें गी वापस आहनने आहले भारती प्रतिनिधिमंडल दी अगुवाई करा'रदे न। सोशल मीडिया पोस्ट च एल.जी होरें अपने जाने बारै घोशणा कीती।

उनें इस पवित्र मौके लेई प्रधानमंत्री नरेंद्र मोदी हुंदा आभार जताया ऐ ते अवशेषे दी वापसी गी अंतरराष्ट्री संस्कृतिक कूटनीति च इक महत्वपूर्ण पल दस्सेआ जेड़ा प्राचीन बौद्ध विरासत दे संरक्षक दे तौरा पर भारत दी भूमिका गी होर मजबूत करदा ऐ।

<><><><><><>

#### Darbar Move

इक महत्वपूर्ण प्रशासनिक गैँस तैहत जम्मू-कश्मीर सरकार नै सदिएं परानी दरबार मूव आहली रिवायत गी फही बहाल करी दिता ऐ। एह गैँस 4 बर्रे दे वक्फे मगरा पुट्टी गई ऐ। अधिकारिक आदेश मूजब श्रीनगर च इसलै कम्म करा'रदे किश दफ्तर 31 अक्टूबर गी ते किश दफ्तर पैहली नवंबर गी बंद होडन। एह दफ्तर 3 नवंबर 2025 गी जम्मू च खुल्लडन। दरबार मूव आहली रिवायत 2021 च रोकी गई ही। कल इस बारै प्रेस कांफ्रेंस गी संबोधित करदे होई मुखमंत्री उमर अब्दुल्ला होरें आखेआ।

<><><><><><>

#### CM Reservation

जम्मू-कश्मीर सरकार नै आरक्षण सरबंधी कैबिनेट उप समिति आसेआ पेश कीती गेदी रिपोर्ट गी मंजूरी देई दिती ऐ ते हून एह खीरी मंजूरी लेई उपराज्यपाल होरें'गी भेजी दिती जाग। मुखमंत्री होरें एह गल्ल कल इक प्रेस कांफ्रेंस गी संबोधित करदे होई आक्खी। इक सवाल दा परता दिंदे होई मुखमंत्री उमर होरें आखेआ जे समाज कल्याण मैहकमे गी मंत्रीमंडल दा जापन तैयार करने दा निर्देश दिता गेआ ऐ ते मेद ऐ जे अगले किश दिनें च एह प्रक्रिया पूरी होई जाग। उनें आखेआ .....

<><><><><><>

#### CM Samagra Shiksha

मुखमंत्री उमर अब्दुल्ला होरें कल जम्मू प्रांत दे बक्ख-बक्ख जिलें थमां स्कूली शिक्षा मैहकमे दे 863 कच्चे लग्गे दे कंटीजेट पेड वर्करें गी पक्के करने दा हुकम जारी कीता ऐ।

इस मौके पर उनें समग्र शिक्षा दे तैहत विद्या समीक्षा केंद्र दा बी उद्घाटन कीता ते शिक्षा प्रणाली गी मजबूत करने लेई आई.सी.टी ते एनालेटिक्स प्लेटफार्म्स बी शुरू कीते। मुखमंत्रि होरें आखेआ जे जम्मू-कश्मीर दे सभने हायर सैकेंडरी ते हाई स्कूलें च मार्च 2026 तगर स्मार्ट क्लास रूम ते लैब्स होडन। उनें नमैं पक्के कीते गेदे कर्मचारियें गी आखेआ जे ओह शिक्षा दी गुणवत्ता च होर सुधार आहनने आस्तैं अपने आप गी समर्पित करन।

<><><><><><>

## GST-Diwali

हाल च कीते गेदे जीएसटी सुधारें करी कारोबार उपपर सकारात्मक असर होआ ऐ ते देआली दा ध्यार औने आहलाऐ ते एहदे चलदे कारोबारियें एहदा सुआगत कीता ऐ। इक मकामी कारोबारी नै आखेआ ऐ जे इस बदलाव कन्नै चीजें-बस्तें दी कीमतें च खासी कमी आई ऐ। इस गैंs कन्नै दुकानदार, उपभोक्ताएं गी सस्ते भाएं उपपर चीजां बेची सकडन। ओब्बी त्यौहारी रूतें दरान। इनें सुधारें कन्नै मकामी अर्थ बवस्था गी बढ़ावा थहोग ते उपभोक्ताएं गी बी राहत थहोग। इक मकामी नै इस बारे बोलदे होई आखेआ।

<><><><><><>

## Dy CM 1 Year

उपमुखमंत्रि सुरिंद्र चौधरी होरें आखेआ ऐ जे मुखमंत्रि उमर अब्दुल्ला हुंदी अगुवाई आहली सरकार नै अपने कार्यकाल दा इक बरा पूरा करी लैता ऐ ते एह सरकार जम्मू-कश्मीर दे लोकें दे सुखने गी पूरा करने लेई प्रतिबद्ध ऐ। उपमुखमंत्रि होरें एह गल्ल अनंतनाग ते कुलगाम जिलेंदे अपने व्यापक दौरे दरान आक्खी जित्थे उनें तकरीबन 9 करोड़ रपे दियें बक्ख-बक्ख विकास परियोजनाएं दा नीह पत्थर रक्खेआ।

अपने इस दौरै दरान उन्हें लोकेँ गी आखेआ जे ओह् इस सरकार उप्पर अपना भरोसा बनाए रखन। उन्हें इस गल्ला दा भरोसा बी दोआया जे हर इक फैसला लोकेँ दे हित च होग। मीडिया आहलें कन्नेँ गल्लबात करदे होई उपमुखमंत्री होरेँ आखेआ

<><><><><><>

### Proclamation Orders

जम्मू-कश्मीर पुलस नै हिज्बुल मुजाहिदीन दे आपु बनी बैठे दे कमांडर मोहम्मद युसुफ शाह उर्फ सैयद सलाहुद्दीन दे खलाफ सार्वजनिक हुक्म जारी कीता जेड़ा इस्सलैँ पाकिस्तान च ऐ। एह् कार्रवाई डांगीवाचा थाने च दर्ज इक मामले कन्नेँ सरबन्धत ऐ। पुलस नै एह् घोशणा इक आधिकारिक सोशल मीडिया पोस्ट दे जरिए कीती। बडगाम पुलस नै पाकिस्तान आधारित आतंकी मुजफ्फर दी संपत्ति गैर कनूनी गतिविधिएं दी रोकथाम सरबन्धी कनूनी तैहत जब्त कीती।

<><><><><><>

### Poshan Mah

आई.सी.डी.एस उधमपुर दे जिला प्रोग्राम अफसर ते जिला प्रशासन आसेआ पोषण मेले दे समापन समारोह दा आयोजन कीता गेआ। एह् आयोजन आई.सी.डी.एस दफ्तर रामनगर च होआ। इस दरान लोकेँ गी सत्तदार खुराक ते समुदाय दी सेहत पर खास ध्यान दिता गेआ। बक्ख-बक्ख सरबन्धी मैहकमें, आप सहायता समूहें ते आंगनवाड़ी कार्यकर्ताएं अपने स्टॉल लाए दे हे। एस.डी.एम रामनगर स्वाती शिमेर होर इस मौकेँ मुख परौहने दे तौर पर मौजूद हियां। उन्हें सत्तदार खुराक ते बच्चें दी भलाई बेहतरी बारे जागरूकता पैदा करने दे जत्नेँ लेई सभनेँ दी सराहना कीती। इस कार्यक्रम दा मकसद सामुदायिक शमूलियत गी बदाना ऐ। इस बारेँ होर जानकारी दिंदे होई एस.डी.एम रामनगर होरेँ आखेआ.....

<><><><><><>

## Food Safety Diwali

औंदे देयाली दे त्यौहार दे मददेनजर खाद्य सुरक्षा मैहकमा रामबन आसेआ इक व्यापक मुहिम चलाई गई। एहदा मकसद बजारें च उपलब्ध खाने-पीने आहली चीजें दे म्यार गी यकीनी बनाना हा। सरबन्धी प्रशासन नै दुकानें दी जांच कीती ते उत्थे उपलब्ध चीजें दे म्यार दी परख कीती। इस दरान उनें लोकें खलाफ जुर्माना बी लाया गेआ जेड़े नियमें दी खलाफवर्जी करा करदे हे। खाद्य सुरक्षा सरबन्धी टीम दे माहिर लोकें गी सौहगा कीता जे ओह त्यौहारें आहली रूतें दरान मिठाइयां खरीदने बेल्ले उंदी पूरी जांच परख करी लैन। जिला प्रशासन रामबन नै आखेआ ऐ जे एह मुहिम उपभोक्ताएं दी हिफाजत, साफ-सुथरा कारोबार ते पर्यावरण गी साफ-स्वच्छ बनाई रखने लेई चलाई गई ऐ। एह मुहिम उनें लोकें खलाफ इक सख्त रौंs ऐ जेड़े घटिया समान बेचदे न। इस बारें होर जानकारी दिंदे होई रामबन दे खाद्य सुरक्षा अफसर बलबीर सिंह होरें आखेआ.....

<><><><><><>